



REPUBLIKA E SHQIPËRISË
KËSHILLI I EMËRIMEVE NË DREJTËSI

VENDIM

Nr. 5, datë 02.04.2019

PËR
KRITERET DHE PROCEDURËN E VLERËSIMIT, PIKËZIMIT DHE RENDITJES
SË KANDIDATËVE PËR POZICIONET VAKANTE NË GJYKATËN
KUSHTETUESE DHE TË INSPEKTORIT TË LARTË TË DREJTËSISË¹
(Ndryshuar me vendimin nr.4, datë 06.02.2020, të Këshillit të Emërimeve në Drejtësi)²
(Ndryshuar me vendimin nr.7, datë 10.07.2020, të Këshillit të Emërimeve në Drejtësi)³

Në mbështetje të pikës 2 të nenit 229 dhe të pikës 6 të nenit 240 të ligjit nr. 115/2016 “Për organet e qeverisjes së sistemit të drejtësisë”, Këshilli i Emërimeve në Drejtësi

VENDOSI :

I. Dispozita të përgjithshme

1. Ky vendim përcakton rregulla më të hollësishme lidhur me:

- a) kriteret e vlerësimit, pikëzimit dhe të renditjes së kandidatëve;
- b) veprimet përgatitore dhe procedurat që Këshilli i Emërimeve në Drejtësi (*Këshilli*) zhvillon për vlerësimin, pikëzimin dhe renditjen e kandidatëve për pozicionet vakante për gjyqtar në Gjykatën Kushtetuese dhe për Inspektor të Lartë të Drejtësisë.

2. Përcaktimi në këtë Vendim i rregullave më të hollësishme mbi procedurat e përzgjedhjes së kandidatëve për anëtarë të Gjykatës Kushtetuese dhe Inspektor të Lartë të Drejtësisë, si edhe mbi kriteret e vlerësimit, pikëzimit e të renditjes së kandidatëve, kanë për qëllim realizimin e kësaj procedure duke u bazuar në meritat e kandidatëve dhe duke respektuar procesin e rregullt ligjor, si edhe parimet e përgjithshme të procedurës administrative.

II. Kriteret e vlerësimit të kandidatëve, pesha specifike dhe pikëzimi i tyre

¹ Botuar në Fletoren Zyrtare nr. 32, datë 15 Mars 2019
http://www.qbz.gov.al/botime/fletore_zyrtare/2019/PDF-2019/32-2019.pdf

² Botuar në Fletoren Zyrtare nr.16, datë 11 Shkurt 2020
<https://qbz.gov.al/eli/fz/2020/16/8bfbb7ba-a745-4fab-9201-22aa10598e64>

³ Botuar në Fletoren Zyrtare nr.131, datë 14 korrik 2020
<https://qbz.gov.al/eli/fz/2020/131/600a9edd-d5db-4f8e-ae5f-d39ddc28ea2d>

3. Vlerësimi, pikëzimi dhe renditja e kandidatëve për vendet vakante në Gjykatën Kushtetuese bëhet duke u bazuar në kriteret e posaçme të parashikuara në pikën 4 dhe 5 të nenit 125 të Kushtetutës dhe në nenin 7/a të ligjit nr. 8577/2000 “Për organizimin dhe funksionimin e Gjykatës Kushtetuese të Republikës së Shqipërisë”, të plotësuara, për aq sa nuk përcaktohet ndryshe në këto dispozita, me kriteret e përgjithshme të vlerësimit të parashikuara në nenin 240 të ligjit nr. 115/2016.

4. Vlerësimi, pikëzimi dhe renditja e kandidatëve për vendin vakant të Inspektorit të Lartë të Drejtësisë bëhet duke u bazuar në kriteret e posaçme të parashikuara në nenin 147/d të Kushtetutës dhe në nenet 199 e 201 të ligjit nr. 115/2016, të plotësuara me kriteret e parashikuara nga neni 240 i këtij ligji.

5. Detajimi i mëtejshëm i të kriterëve ligjore të posaçme dhe të përgjithshme të vlerësimit dhe përcaktimi më i hollësishëm i peshës specifike të tyre në pikëzimin dhe renditjen e kandidatëve bëhet në këtë Kre, në Kreun V dhe në Shtojcat 1 dhe 2 të këtij Vendimi.

6. Kriteret e vlerësimit, pikëzimit dhe të renditjes së kandidatëve klasifikohen në tre kategori:

- a) Meritat profesionale;
- b) Meritat morale;
- c) Meritat organizative, drejtuese dhe menaxhuese.

7. Secila kategori kriteresh e treguar në pikën 6 të këtij Vendimi përfshin, në radhë të parë, kriteret e posaçme ligjore të vlerësimit, të plotësuara me kritere të tjera të së njëjtës natyrë sipas përcaktimeve më të përgjithshme të nenit 240 të ligjit nr. 115/2016.

8. Peshat specifike dhe pikëzimi maksimal i secilës kategori kriteresh të treguara në pikën 6 të këtij Vendimi, bazohet në radhë të parë në rëndësinë dhe peshën që i përcaktohet kriterëve përkatëse që ato kanë në përbërje nga vetë parashikimi i tyre i posaçëm në ligjin nr. 8577/2000 ose në nenet 199 dhe 201 të ligjit nr. 115/2016, të cilat plotësohen me peshën specifike të kriterëve më të përgjithshme sipas nenit 240 të ligjit nr. 115/2016.

9. Në të njëjtën mënyrë, edhe rëndësia, peshat specifike dhe pikëzimi maksimal i secilit element të kriterit të vlerësimit bazohet në atë që rezulton nga parashikimet e posaçme të treguara në pikat 3 ose 4 të këtij Vendimi, të plotësuara me parashikimet e nenit 240 të ligjit nr. 115/2016.

10. Për efekt të renditjes së kandidaturave, pikëzimi përfundimtar i kandidatit të vlerësuar është shuma e pikëve që i është përcaktuar nga vlerësimi i secilit kriter të përfshirë në të tre kategoritë e kriterëve të vlerësimit dhe pikëzimit.

11. Ndarja e kriterëve të vlerësimit në kategori, lista e kriterëve që përbëjnë secilën kategori, pikëzimi maksimal i secilës prej tyre, si edhe burimet dokumentare dhe metoda e vlerësimit përcaktohen në mënyrë të hollësishme nga:

- a) Shtojca nr.1 “Kriteret e vlerësimit dhe metodologjia e pikëzimit të kandidatëve për gjyqtar në Gjykatën Kushtetuese”;
- b) Shtojca nr.2 “Kriteret e vlerësimit dhe metodologjia e pikëzimit të kandidatëve për Inspektor i Lartë i Drejtësisë”.

12. Këshilli miraton dhe bën publike shpjegime të hollësishme lidhur me metodologjinë mbi të cilin bazohet në vlerësimin dhe caktimin e pikëve lidhur me secilin prej kritereve të treguar në Shtojcat nr.1 dhe nr.2 të këtij Vendimi.

III. Rregulla të përgjithshme të procedurës së përzgjedhjes së kandidatëve

A. Përgatitja dhe zhvillimi i procedurës së përzgjedhjes së kandidatëve

13. Në fazat e kryerjes së procedurës së verifikimit, relatori i vendit vakant realizon njëkohësisht edhe veprimet përgatitore të procedurës së përzgjedhjes së kandidatëve.

14. Procedura e përzgjedhjes së kandidatëve, nëpërmjet vlerësimit, pikëzimit dhe renditjes së tyre nga Këshilli, fillon me thirrjen e mbledhjes, e cila zhvillohet jo më vonë se 5 ditë nga ajo e përfundimit të procedurave të verifikimit të të gjithë kandidatëve që kanë shprehur interesin pranë të njëjtit organ emërtese që ka shpallur vendet vakante.

14/1. Nëse Këshilli zbulon rrethana ose prova të reja me shpresë, që kanë rëndësi për lejimin e kandidimit, të cilat nuk dihen dhe nuk mund të dihen gjatë zhvillimit të procedurës administrative të verifikimit, atëherë procedon me rishikimin e vendimit të lejimit.⁴

15. Këshilli, duke qëndruar i mbledhur, bën vlerësimin, pikëzimin dhe renditjen e kandidatëve për vendet vakante të shpallura nga i njëjti organ emërtese, jo më vonë se 10 ditë nga dita e mbledhjes.

B. Të drejtat e kandidatit

16. Kandidati ka të drejtë të përzgjedhë dhe të paraqesë pranë Këshillit dokumente që i çmon të nevojshme për vlerësimin dhe pikëzimin e kandidaturës sipas rregullave dhe kritereve të përcaktuara në ligj dhe në këtë Vendim.

17. Kandidati ka të drejtë të parashtojë mendime e të dëgjohet në mbledhjen e Këshillit, mbi motivet dhe objektivat e kandidimit, cilësitë morale dhe aftësitë profesionale për tu përzgjedhur nga organi i emërtesës, sipas rastit, gjyqtar i Gjykatës Kushtetuese ose Inspektor i Lartë i Drejtësisë.

18. Kandidati ka të drejtë që, në procedurën e përzgjedhjes, me kërkesën e tij, të njihet me dokumentet e dosjes së kandidimit dhe aktet procedurale të kryera nga relatori dhe Këshilli për vlerësimin, pikëzimin dhe renditjen e kandidaturës, si edhe të marrë kopje të tyre, sipas rregullave të Kodit të Procedurave Administrative dhe atyre të përcaktuara në këtë Vendim.

C. Afatet dhe llogaritja e tyre

19. Afatet në procedurën e përzgjedhjes së kandidatëve caktohen në ditë kalendarike.

20. Përveç kur parashikohet shprehimisht ndryshe në ligj ose në këtë Vendim, në llogaritjen e afatit përjashtohet dita kur ka ndodhur ngjarja, nga e cila fillon të ecë afati.

⁴ Shtuar pika 14/1 me vendimin nr.4, datë 06.02.2020, të Këshillit të Emërimeve në Drejtësi.

21. Të shtunat, të dielat dhe ditët e festave zyrtare nuk pengojnë fillimin dhe kohëzgjatjen e afateve. Kur dita e fundit e një afati bie e shtunë, e diel ose një ditë feste zyrtare, afati mbaron në ditën e punës që vjen pas saj.

22. Dita e fundit e afatit të kryerjes së veprimit procedural, paraqitjes së kërkesave dhe shpjegimeve, vazhdon deri në orën 24 të saj. Afati nuk quhet i humbur, kur kërkesa, shpjegimet ose akti është dërguar me postë edhe në ditën e fundit të afatit.

23. Kandidati njofton menjëherë relatorin ose Këshillin, në rastet kur, për pamundësi objektive ose motive të tjera të justifikuara, nuk mund të paraqitet apo të paraqesë shpjegime dhe dokumente brenda afatit të përcaktuar në këtë Vendim për procedurat e përzgjedhjes së kandidaturave. Kur i vlerëson motivet e parashtruara me shkrim si të justifikuara, relatori apo Këshilli i cakton kandidatit një afat të ri të arsyeshëm.

Ç. Njoftimet

24. Njoftimet e Këshillit drejtuar kandidatit gjatë procedurës së përzgjedhjes bëhen me shpresë, në adresën postare ose në adresën elektronike të deklaruara për këtë qëllim nga kandidati, pranë Këshillit ose organit të emërtesës ku ka paraqitur kandidaturën.

25. Njoftimet dhe kërkesat e kandidatit drejtuar Këshillit bëhen me shkrim, duke i depozituar drejtpërdrejt pranë zyrës së posaçme të Këshillit në Gjykatën e Lartë ose në adresën elektronike të Këshillit, e cila i është bërë e njohur për këtë qëllim secilit kandidat, me fillimin e procedurave të verifikimit të kandidaturave.

26. Kandidati ka detyrimin të njoftojë menjëherë me shkrim Këshillin për çdo ndryshim të adresës postare dhe elektronike të deklaruar.

IV. Veprimet përgatitore për realizimin e procedurës së përzgjedhjes së kandidatëve

27. Veprimet përgatitore për realizimin e procedurës së përzgjedhjes së kandidatëve zhvillohen njëkohësisht me procedurat e verifikimit të tyre.

28. Relatori ndjek dhe kryen të gjitha veprimet procedurale:

a) të komunikimit me kandidatët në lidhje me paraqitjen, pranimin dhe plotësimin e dokumenteve të nevojshme për vlerësimin, pikëzimin dhe renditjen e kandidatëve sipas përcaktimeve të ligjit dhe këtij Vendimi;

b) të përgatitjes së dokumentacionit dhe paraqitjes së projektakteve të nevojshme për shqyrtim nga Këshilli lidhur me procedurën e përzgjedhjes së kandidatëve.

29. Në rastin e kandidatëve që, njëkohësisht, kanë shprehur interes për më shumë se një vend vakant në proces shqyrtimi nga Këshilli, secili nga relatorët përkatës të vendeve vakante:

a) administron kopje të plotë të dokumentacionit të paraqitur nga kandidati për procedurën e vlerësimit, pikëzimit dhe renditjes së kandidatëve;

b) njofton kandidatin për të dhënë shpjegime apo për të saktësuar ose plotësuar dokumentet e paraqitura, në rastet kur vlerëson se janë me mangësi të lidhura me vërtetësinë, rregullshmërinë ose plotësinë e përmbajtjes së dokumentit;

c) njofton menjëherë relatorët e tjerë të vendeve vakante për veprimin procedural të kryer sipas shkronjës “b)” të kësaj Pike, si edhe i përcjell atyre shpjegimet dhe dokumentet përkatëse të paraqitura nga kandidati sipas kësaj procedure;

ç) përgatit dhe paraqit për shqyrtim në Këshill relacionin që përmban përshkrimin e procedurave të ndjekura gjatë veprimeve përgatitore, të dokumenteve dhe përmbledhjen faktike të tyre për qëllime të vlerësimit dhe pikëzimit të kandidatit, si edhe kopje të këtyre dokumenteve bashkëlidhur relacionit.

30. Në kryerjen e detyrës, relatori mbështetet nga këshilltarët ligjorë dhe personeli administrativ i Gjykatës së Lartë, të cilët, kanë detyrimin të ndjekin procedurat, të kryejnë veprimet dhe të përgatisin aktet përkatëse, sipas udhëzimeve të relatorit.

31. Brenda 15 ditëve nga ajo e paraqitjes në zyrën e posaçme të Këshillit pranë Gjykatës së Lartë për të kryer veprimet e parashikuara nga pika 22 e Vendimit nr. 4 datë 11.03.2019 të Këshillit të Emërimeve në Drejtësi, kandidati dorëzon pranë kësaj zyre dokumentet e nevojshme për përzgjedhjen, vlerësimin, pikëzimin dhe renditjen e kandidatëve sipas përcaktimeve të ligjit dhe të këtij Vendimi.

32. Lista e dokumenteve që kandidati dorëzon në kopje origjinale ose të vërtetuar sipas ligjit përfshin :

a) jetëshkrimin e përditësuar me të dhënat deri në kohën e dorëzimit sipas pikës 31 të këtij Vendimi, të hartuar sipas formatit të përcaktuar nga Këshilli;

b) dokumentin që përshkruan motivimin e kandidimit dhe objektivat nëse emërohet;

c) pesë dokumente profesionale të përzgjedhura nga vetë kandidati për vlerësim sipas metodologjisë profesionale të miratuar nga Këshilli;

ç) dokumente të tjerë që shërbejnë për vlerësimin e kandidatit, sipas përcaktimeve orientuese në Shtojcën nr. 1 ose Shtojcën nr.2 të këtij Vendimi, në zërin “Burimet e Vlerësimit”, për secilën kategori dhe kriter të vlerësimit.

d) deklarin, nëse zotëron, të njohurive në gjuhë të huaja, të shoqëruar nëse i disponon me dokumente përkatëse vërtetuese të lëshuar nga subjekte publike ose private të specializuara.

33. Nëse nga shqyrtimi i dokumentacionit të paraqitur nga secili kandidat, relatori vlerëson se ka mangësi të lidhura me vërtetësinë, rregullshmërinë ose plotësinë e përmbajtjes së dokumentit, njofton menjëherë kandidatin, duke i caktuar një afat jo më shumë se 5 ditë për të dhënë shpjegime apo për të saktësuar ose plotësuar mangësitë e dokumentit të paraqitur.

34. Mungesa e përgjigjes së kandidatit për dhënien e shpjegimeve dhe për saktësimin ose plotësimin e mangësive për dokumentet e paraqitura nuk pengon vijimin e veprimeve përgatitore të relatorit për procedurën e vlerësimit, pikëzimit dhe renditjes së kandidatit.

35. Njëkohësisht, ose menjëherë pas përgjigjes së dhënë nga kandidati sipas pikës 33 të këtij Vendimi, si edhe kur vjen në dijeni, për rrethana që vënë në dyshim vërtetësinë dhe saktësinë e të dhënave që përmbahen në dokumente të paraqitura nga kandidati, relatori mund të kërkojë nga subjekte publike dhe private, brenda dhe jashtë territorit të Shqipërisë, shpjegime, të dhëna apo kopje të konfirmuara zyrtarisht prej tyre.

36. Pas kryerjes së veprimeve përgatitore të parashikuara në pikat 31 deri 35 të këtij Vendimi dhe duke u bazuar në procedurat dhe kriteret e përcaktuara në ligj, të detajuara në këtë Vendim dhe në Shtojcat e tij, relatori :

a) shqyrton dhe përgatit dokumentacionin e secilit kandidat për vlerësimin dhe pikëzimin e kandidaturës;

b) përgatit relacionin që përmban përshkrimin e procedurave të ndjekura gjatë veprimeve përgatitore, të dokumenteve të paraqitura nga kandidati apo të ardhura nga subjekte publike a

private mbi kërkesën e relatorit, përmbledhjen faktike të përmbajtjes së këtyre dokumenteve për qëllime të vlerësimit dhe pikëzimit të kandidatit, si edhe kopje të këtyre dokumenteve bashkëlidhur relacionit.

37. Veprimet përgatitore për procedurën e vlerësimit, pikëzimit dhe renditjes së kandidatit ndërpriten në rastin kur Këshilli vendos urdhërimin e ndalimit të kandidimit.

38. Në përfundim të procedurave të verifikimit të të gjithë kandidatëve për vendin vakant, relatori njofton Kryetarin dhe i paraqet për shqyrtim Këshillit relacionin dhe dokumentacionin e përgatitur për procedurën e përzgjedhjes së kandidaturave.

V. Fillimi dhe zhvillimi i procedurës së vlerësimit, pikëzimit dhe renditjes së kandidatëve

A. Thirrja e mbledhjes për fillimin e procedurës së përzgjedhjes së kandidatëve

39. Kryetari i Këshillit, menjëherë pas njoftimit të relatorit të vendit vakant për përfundimin e procedurave të verifikimit dhe pasi të jetë siguruar që vendimi i lejimit të jetë arsyetuar dhe njoftuar rregullisht çdo kandidati, thërret mbledhjen e Këshillit për fillimin e procedurës së përzgjedhjes së kandidatëve, duke i dërguar anëtarëve edhe materialet e çështjes. Mbledhja zhvillohet jo më vonë se 5 ditë nga ajo e njoftimit të relatorit.⁵

39/1. Kur procedura e verifikimit përfundon në fund të vitit kalendarik, atëherë afati i përcaktuar në pikën 39 është jo më vonë se 3 ditë nga dita e konstituimit të Këshillit të radhës.⁶

40. Në rast se Këshilli ka për shqyrtim, njëkohësisht, procedurat e verifikimit dhe përzgjedhjes të kandidatëve për më shumë se një vend vakant në Gjykatën Kushtetuese e që i përkasin të njëjtit organ emërtese, mbledhja e Këshillit thirret dhe zhvillohet jo më vonë se 5 ditë nga ajo e njoftimit më të fundit nga relatorët për përfundimin e procedurës së verifikimit të kandidatëve të të gjitha këtyre vendeve vakante.

41. Mbledhja e Këshillit për procedurat e përzgjedhjes së kandidatëve është e vlefshme nëse marrin pjesë së paku 5 anëtarë të tij.

42. Në mbledhjen e Këshillit për procedurat e përzgjedhjes së kandidatëve marrin pjesë anëtarët. Gjithashtu, marrin pjesë Avokati i Popullit dhe përfaqësuesit e subjekteve që ftohen sipas ligjit, mosparaqitja e të cilëve nuk përbën shkak për shtyrjen e mbledhjes.

B. Seanca e parë e mbledhjes për procedurat e përzgjedhjes së kandidatëve

43. Dita dhe koha e zhvillimit të seancës së parë të mbledhjes së Këshillit i njoftohet Avokatit të Popullit dhe subjekteve që ftohen të marrin pjesë në mbledhje sipas ligjit. Avokatit të Popullit i dërgohet edhe relacioni mbi veprimet përgatitore të kryera dhe dokumentacioni i përgatitur nga relatori për shqyrtim në procedurën e përzgjedhjes së kandidatëve. Ky njoftim

⁵ Shtuar fjalë me vendimin nr.4, datë 06.02.2020, të Këshillit të Emërimeve në Drejtësi.

⁶ Shtuar pika 39/1 me vendimin nr.4, datë 06.02.2020, të Këshillit të Emërimeve në Drejtësi.

bëhet publik edhe në faqen zyrtare të Gjykatës së Lartë, në pjesën e caktuar për Këshillin e Emërimeve në Drejtësi.

44. Në seancën e parë të mbledhjes për procedurat e përzgjedhjes së kandidatëve, Këshilli vendos për çështje që lidhen me procedurat e ndjekura gjatë veprimeve përgatitore dhe plotësimin e dokumentacionit të paraqitur për vlerësim, përcaktimin e kalendarit të intervistave me kandidatët dhe përcaktimin e listës së ekspertëve që mund të jetë e nevojshme të thirren për vlerësimin e nivelit të zotërimit të gjuhëve të huaja të deklaruara prej tyre.

45. Në këtë mbledhje, Këshilli vendos pasi dëgjon parashtrimet dhe propozimet e relatorëve, sqarimet e tyre mbi pyetjet e anëtarëve, si edhe mendimin e Avokatit të Popullit lidhur me mënyrën e procedimit të ndjekur për përgatitjen e dokumentacionit të kandidatëve.

46. Bisedimet e çështjeve, si edhe votimi i vendimit bëhen vetëm me praninë e anëtarëve të Këshillit.

47. Në përfundim të bisedimeve, për zgjidhjen e çështjes, i pari voton relatori, i pasuar nga Kryetari dhe me radhë nga anëtarët e tjerë, sipas renditjes së përbërjes së Këshillit që rezultojn nga përzgjedhja me short e anëtarëve nga Presidenti apo Kuvendi.

48. Vendimet e Këshillit lidhur me çështjet e përcaktuara në pikën 44 të këtij Vendimi, merren me shumicën e votave të të gjithë anëtarëve të Këshillit. Abstenimi nuk lejohet.

49. Vendimi nënshkruhet nga të gjithë anëtarët e Këshillit që kanë marrë pjesë në dhënien e tij. Anëtari, mendimi i të cilit ka mbetur në pakicë, shkruan fjalën “kundër” dhe nënshkruan vendimin. Vendimi bëhet menjëherë publik në faqen zyrtare të Gjykatës së Lartë, në pjesën e caktuar për Këshillin e Emërimeve në Drejtësi

C. Seancat e mbledhjes për intervistat me kandidatët

50. Kandidati njoftohet për vendin, ditën dhe kohën e paraqitjes për intervistë në mbledhjen e Këshillit. Njoftimi përmban edhe udhëzimet lidhur me natyrën dhe kohëzgjatjen e intervistës.

51. Këshilli njofton ekspertët për vendin, ditën dhe kohëzgjatjen e shërbimit të kërkuar në mbledhjen e Këshillit. Njoftimi përmban edhe udhëzimet e Këshillit lidhur me natyrën e shërbimit të kërkuar.

52. Nëse kandidati ka deklaruar zotërimin e gjuhëve të huaja dhe Këshilli ka vendosur të vlerësojë me shkallën e zotërimit, eksperti i thirrur për këtë qëllim bisedon dhe i drejton pyetje kandidatit gjatë procedurës së intervistës, shqyrton dokumente me shkrim në gjuhë të huaj të paraqitura nga vetë kandidatët, si dhe përgatit mendimin me shkrim për shkallën e zotërimit të gjuhës së huaja.

53. Në ditën dhe kohën e paracaktuar, pas deklarimit të hapjes së seancës, Këshilli verifikon paraqitjen e ekspertëve, u kujton atyre rëndësinë e detyrës për të cilën janë thirrur dhe i fton të bëjnë betimin se do të kryejnë me profesionalizëm dhe me nder detyrën që u është besuar.

54. Pas betimit, ekspertëve u njoftohen kandidatët që kanë deklaruar se zotërojnë njohuri në gjuhë të huaja për të cilët Këshilli vlerëson të nevojshëm mendimin e ekspertit dhe u kërkohet të shprehen nëse janë në kushte papajtueshmërie apo konflikti interesi me ta.

55. Këshilli thërret për intervistë kandidatët sipas programit të miratuar paraprakisht me vendim në seancën e parë të mbledhjes së tij.

56. Kandidati pyetet fillimisht nëse ka pretendime për gjendje papajtueshmërie a konflikti interesi me anëtarë të Këshillit, pjesëmarrës të tjerë në mbledhje dhe me ekspertët.

57. Pas orientimit për mënyrën e zhvillimit të intervistës dhe kohëzgjatjen e saj, kandidati ftohet për parashtrimin e lirë të motiveve dhe arsyeve të kandidimit dhe objektivave që synon të ndjekë nëse emërohet në detyrë nga organi i emërtesës.

58. Intervista vijon me pyetje të anëtarëve të Këshillit dhe përgjigjet e kandidatit.

59. Ekspertët e thirrur nga Këshilli bisedojnë me kandidatin, në gjuhët e huaja të deklaruara, për çështje të natyrës së përgjithshme dhe të fushës profesionale.

60. Brenda afatit që i caktohet nga Këshilli, ekspertët hartojnë mendimin me shkrim për shkallën e zotërimit të gjuhëve të huaja nga kandidati, sipas kritereve dhe mënyrës së vlerësimit të përcaktuar në Shtojcën nr. 1 ose Shtojcën nr. 2 të këtij Vendimi dhe në metodologjinë e miratuar nga Këshilli për vlerësimin dhe pikëzimin e kandidaturave.

Ç. Bisedimet e Këshillit për vlerësimin, pikëzimin dhe renditjen e kandidatëve

61. Në përfundim të seancave të mbledhjes për intervistat e të gjithë kandidatëve për vendin vakant ose për vendet vakante të shpallura nga i njëjti organ emërtese, Këshilli vijon me bisedimin për vlerësimin, pikëzimin dhe renditjen e kandidatëve.

62. Bisedimet e çështjes, si edhe votimi i vendimit bëhen vetëm nga anëtarët e Këshillit. Avokati i Popullit merr pjesë në cilësinë e vëzhguesit në funksion të transparencës dhe besimit të publikut.

63. Vlerësimi dhe pikëzimi i kandidatëve bëhet sipas procedurës dhe kritereve të parashikuara në ligj dhe në rregullat e detajuara të këtij Vendimi e të Shtojcave bashkëlidhur. Ky vlerësim mbështetet në dokumentacionin e paraqitur dhe intervistat e realizuara me secilin kandidat.

64. Rënditja e kandidatëve bëhet duke u bazuar në rezultatin e pikëzimit për secilin kandidat që rezulton nga pjesëtimi i shumës së pikëve totale të caktuara nga të gjithë anëtarët e Këshillit me numrin e anëtarëve.

65. Në rast të barazisë së pikëve mes kandidatëve, renditja përcaktohet nga rezultati i pikëve të dhëna për kategorinë “Merita Profesionale” dhe, nëse rezulton përsëri barazi në pikë, nga rezultati i pikëve për kriterin “vjetërsia në profesion”.

66. Këshilli vlerëson meritat dhe bën pikëzimin e secilit kandidat. Relatori diskuton e parashtron i pari arsyetimin mbi vlerësimin e meritave të kandidatit dhe pikëzimin për secilin kriter, i pasuar nga Kryetari dhe me radhë nga anëtarët e tjerë, sipas renditjes së përbërjes së Këshillit që rezulton nga përzgjedhja me short e anëtarëve nga Presidenti apo Kuvendi. Abstenimi nuk lejohet.

67. Në përfundim të diskutimit, relatori përgatit vendimin për vlerësimin e kandidatit ku pasqyrohet totali i pikëve të dhëna nga Këshilli sipas mbledhjes aritmetike të pikëzimit të dhënë nga të gjithë anëtarët pjesëtuar me numrin e tyre. Po, kështu, në këtë vendim pasqyrohet edhe arsyetimi lidhur me vlerësimin e Këshillit për kandidatin në lidhje me secilin prej kritereve. Vendimi i vlerësimit dhe pikëzimit të kandidatit, i hartuar sipas kësaj pike, votohet dhe nënshkruhet nga të gjithë anëtarët e Këshillit që marrin pjesë në vlerësim.

68. Bazuar në pikëzimin që rezulton të jetë dhënë nga Këshilli për të gjithë kandidatët, në varësi të numrit të vendeve vakante që janë në shqyrtim dhe organit të emërtesës që i ka shpallur, relatori përgatit dhe i paraqit Këshillit listën përfundimtare që përmban renditjen e kandidatëve për secilin vend vakant.

69. Nëse Këshilli ka në shqyrtim më shumë se një vend vakant për gjyqtar në Gjykatën Kushtetuese, të shpallura nga i njëjti organ emërtese, përgatiten dhe i paraqiten dy lista të veçanta që përmbajnë renditjen e kandidatëve që e kanë shprehur interesin për kandidim pranë atij organi emërtese :

- a) lista që përmban vetëm kandidatët që vijnë nga radhët e gjyqësorit;
- b) lista që përmban kandidatët që nuk vijnë nga radhët e gjyqësorit.

70. Këshilli shqyrton listën përfundimtare të renditjes së kandidatëve të paraqitura nga relatori për të verifikuar:

- a) saktësinë aritmetike të pikëzimit total për secilin kandidat sipas vendimeve përkatëse të vlerësimit,
- b) renditjen e tyre në listat përfundimtare sipas totalit të pikëve të dhëna, si edhe kur është rasti, të kushteve të treguara në pikën 69 të këtij Vendimi.
- c) që dosjet e kandidatëve të jenë të plota dhe në kopje të mjaftueshme për t'u shpërndarë tek organet e emërtesës;
- d) mënyrën e përcjelljes së listës përfundimtare organeve të emërtesës.

71. Krahas listës përfundimtare që përmban renditjen e kandidatëve, relatori përgatit dhe i paraqit për miratim Këshillit edhe projektraportin e arsyetuar, që shoqëron vendimin për listën përfundimtare të renditjes së kandidatëve i cili i dërgohet organit të emërtesës, ku përmbahet analiza tërësore lidhur me plotësimin e kushteve ligjore dhe vlerësimin e kritereve ligjore për secilin kandidat, si edhe për procedurën e ndjekur për vlerësimin dhe renditjen e tyre.

72. Aktet e përcaktuara në pikën 67, 70 dhe 71 të këtij Vendimi miratohen me shumicën e votave e të gjithë anëtarëve të Këshillit. Abstenimi nuk lejohet.

73. Vendimi për pikëzimin dhe listën përfundimtare të renditjes së kandidatëve, si edhe raporti i arsyetuar sipas pikës 67, 70 dhe 71 të këtij Vendimi, nënshkruhen nga të gjithë anëtarët e Këshillit që kanë marrë pjesë në dhënien e tij. Anëtari, mendimi i të cilit lidhur me këto akte ka mbetur në pakicë, shkruan fjalën “kundër” dhe e nënshkruan atë.

74. Përveç rastit kur ka mbetur në pakicë, hartimi i raportit të arsyetuar sipas pikës 71 të këtij Vendimi bëhet nga relatori i çështjes. Anëtari që ka mbetur në pakicë, arsyeton qëndrimin e tij, i cili i bashkohet raportit.

75. Vendimet e Këshillit për vlerësimin dhe pikëzimin e secilit kandidat, listat përfundimtare të renditjes së kandidatëve, mënyra e përcjelljes së tyre organeve të emërtesës dhe raportin e

arsyetuar që i dërgohet organit të emërtesës, shpallen brenda afatit ligjor 10 ditor nga dita e fillimit të kësaj procedurës së vlerësimit, pikëzimit dhe renditjes së kandidatëve.

76. Brenda dy ditëve pune pas shpalljes së tyre, Kryetari i përcjell organit të emërtesës listat përfundimtare të renditjes së kandidatëve dhe raportin e arsyetuar të Këshillit ku përmbahet analiza tërësore lidhur me plotësimin e kushteve ligjore dhe vlerësimin e kritereve ligjore për secilin kandidat, si edhe për procedurën e ndjekur për vlerësimin dhe renditjen e tyre.

77. Kur gjatë zhvillimit të procedurave të vlerësimit, pikëzimit dhe renditjes së kandidatëve, për shkak të tërheqjes nga kandidimi, relatori përkatës i pozicionit vakant konstaton se numri i kandidatëve për atë pozicion vakant në Gjykatën Kushtetuese ose të Inspektorit të Lartë të Drejtësisë, përkatësisht, zbret në më pak se 3 dhe 5 kandidatë, njofton menjëherë Kryetarin, i cili thërret mbledhjen e Këshillit për të vendosur mbi mënyrën e procedimit të mëtejshëm me atë pozicion vakant

D. Publikimi i akteve të procedurës së përzgjedhjes së kandidatëve. Komunikata për median

78. Në faqen zyrtare të Gjykatës së Lartë, në pjesën e caktuar për Këshillin e Emërimeve në Drejtësi, publikohen menjëherë :

- a) vendimet e arsyetuara të Këshillit për përgatitjen e procedurës së vlerësimit, pikëzimit dhe renditjes së kandidatëve;
- b) vendimet e arsyetuara të Këshillit për vlerësimin dhe pikëzimin e secilit kandidat;
- c) listat përfundimtare të renditjes së kandidatëve dhe vendimet miratuese të tyre;
- ç) raporti i arsyetuar që i përcillet organit të emërtesës, i cili përmban analizën e plotësimin të kushteve ligjore dhe të vlerësimit të kritereve ligjore për secilin kandidat;
- d) përmbledhje e procesverbalit të nënshkruar nga të gjithë anëtarët që kanë marrë pjesë në mbledhjen ku vendoset vlerësimi, pikëzimi dhe renditja e kandidatëve;
- dh) komunikata për median sipas përcaktimeve të pikës 3 të nenit 233 të ligjit nr. 115/2016.

VI. Dispozita kalimtare dhe të fundit

79. Pavarësisht nga koha e kandidimit në vende vakante të krijuara përpara hyrjes në fuqi të këtij Vendimi, kandidatët duhet të paraqesin pranë zyrës së posaçme të Këshillit pranë Gjykatës së Lartë dokumentet e nevojshme, me të dhënat e aktualizuara, sipas parashikimeve dhe në afatin e përcaktuar në pikat 31 dhe 32 të këtij Vendimi.

80. Për vendet vakante që tashmë janë krijuar në Gjykatën Kushtetuese të cilat i përkasin të njëjtit organ emërtese, pavarësisht nga përcaktimet e pikës 69 të këtij Vendimi, duke mbajtur parasysh rrethanat e mungesës së njëhershmerisë në shpalljen e vendeve vakante, të kohës së tejzgjatur ndërmjet shpalljeve të konkurrimit për plotësimin e tyre dhe ekzistencën njëkohësisht të vendeve vakante me mandat të plotë dhe të pjesshëm, për të garantuar trajtimin e aplikimeve të kandidatëve në respektim të parimit kushtetues të barazisë përpara ligjit dhe të të drejtës së tyre të zgjedhjes së kandidimit për vende vakante të plotë ose të pjesshme, Këshilli do të procedojë me paraqitjen pranë organit përkatës të emërtesës të një liste të vetme përfundimtare të renditjes së kandidatëve sipas vendit vakant ku kanë shprehur interesin për kandidim.

D. Dispozita të fundit

81. Ky vendim hyn në fuqi pas botimit në Fletoren Zyrtare.

KRYETARI

Ardian Dvorani